

Месяца мая в 21-й день

Всех святых, в земли Карельстей просиявших

На велицей вечерни

Блажен муж: 1-й антифон. На Господи, возвах: стихиры на 8: праздника 3, и святых 5. Стихиры святых, глас 6.

Подобен: Все отложше:

Земля веселится и Небо радуется,/ святии отцы в земли Карельстей просиявшии,/ восхваляюще подвиги и труды ваша,/ душевное благомощие и ума чистоту,/ законом бо естества не победистесь./ О, соборе святыи и полче Божественный,/ земли нашей утверждение вы есте воистину.

Восхвалим Андрея Первозванного/ и святого равноапостольного Владимира,/ яко тех трудами в земли Русстей вера насадиися,/ и донныне благодатию Божию напаяется/ и плод сториичный приносит.

Благоверный княже Александре,/ князей русских похвало,/ воинов соблюдение,/ врагов побеждение,/ сирот и вдов заступниче!/ Приими ныне похвальное пение,/ еже во храмах Божиих совершают людие твои,/ почитающе память твою.

Евангельски Христа возлюбивше,/ преподобнии Зосимо, Савватие и Германе,/ мира отвратистесь,/ в непроходимыя же и пустынный острова Соловецкия зашедше,/ всякия добродетели образу навыкосте,/ мудрой пчеле подобящесь,/ и приятелище изрядно Духу Святому бысте, премудрии.

Радуйся, пустыне, прежде бесплодна и необитаема,/ послежде яко крин цветущая,/ възграйте, горы Валаама и вся древа дубравная,/ хваляще с нами Сергия и Германа,/ вкупе же Арсения и Германа,/ отцы всехвальныя.

Приидите, празднoлюбцы,/ воспoим дивнаго подвижника Церкви Русския,/ Александра Свирскаго,/ с праведными ученики его/ Афанасием, Игнатием, Дионисием и Корнилием,/ Леонидом, Макарием, Ферапонтом и Феодором,/ яко звезды бо возсияша на тверди церковней./ Тех молитвами, Христе Боже наш,/ православных веру утверди,/ яко Человеколюбец.

Преподобнии отцы Никифоре и Геннадие,/ Пахомие и Кирилле,/ Корнилие и Авраамие,/ вы слепым даете свет, болящим исцеление,/ милостиво приклоняющиеся к приходящим с верою/ и просящим помощи вашей./ Мы же, заступники и предстатели вас обретше,/ с теплою молитвою к вам прибегаем.

Идеже бе хлад и мраз,/ идеже леса и дебри,/ тамо жизнь райская процвете/ от святых твоих, Господи,/ Авраамия и Антония, Афанасия и Варлаама,/ Геннадия и Германа,/ иже, оледеневшая сердца людская теплотою веры растопивше,/ плодоносна сия соделаша/ и ныне молятся о душах наших.

**Слава, глас 8:**

Ликуй, Фиваидо русская,/ красуйтесь пустыни и дебри Олонецкия,/ возрадившия святых и славных отцев множество,/ чудным житием всех наставляющих/ миру не прилеплятися,/ крест свой на рамена взяти/ и во след Христу шествовати.

**И ныне, Богородичен, глас 6: Кто Тебе не ублажит, Пресвятая Дево:**

**Вход. Прокимен дне. И чтения три.**

**Пророчества Исаиина чтение (глава 60, ст. 1-5, 11-13):**

Светися, светися, Иерусалиме,/ прииде бо твой свет, и слава Господня на тебе возсия./ Се, тма покрыет землю, и мрак на языки,/ на тебе же явится Господь, и слава Его на тебе узрится./ И пойдут царие светом твоим, и языцы светлостию твоею./ Возведи окрест очи твои и виждь собраная чада твоя:/ се, приидоша вси сынове твои издалеча, и дщери твоя на рамах возмутся./ Тогда узриши и возрадуешься,/ и убоишися и ужаснешися сердцем,/ яко приложится к тебе богатство морское и языков и людей./ И отверзутся врата твоя присно,/ день и ночь не затворятся,/ ввести к тебе силу язык и цари их ведомыя./ Языцы бо и царие, иже не поработают ти, погибнут,/ и языцы запустением запустеют./ И слава Ливанова к тебе приидет,/ кипарисом и певгом и кедром вкупе, прославити место святое Мое,/ и место ногу Моею прославлю.

**Премудрости Иисуса, сына Сирахова, чтение (гл. 44, ст. 1-14):**

Восхвалим убо мужи славны и отцы наша в бытии./ Многу славу созда Господь в них величием Своим от века./ Господствующе во царствиих своих/ и

мужи, именити силою, советующе разумом своим,/ провешавшии во пророчествах;/ старейшины людей в советех/ и в разуме писания людей./ Премудрая словеса в наказании их,/ ищуще гласа мусикийска и поведаяюще повести во писаниих,/ мужи богатии, обдаровани крепостию,/ мирно живуще в жилищих своих./ Все сии в родех прославлени быша,/ и во днех их похвала./ Суть от них иже оставиша имя, еже поведати хвалы./ И суть, ихже несть памяти, и погибоша, яко не сущии,/ и быша яко не бывша, и чада их по них./ Но сии мужие милостивии,/ ихже правды не забвены быша,/ с семенем их пребудет доброе наследие,/ изчадия их в заветех./ Остася семя их и чада их по них,/ до века пребудет семя их,/ и слава их не потребится./ Телеса их в мире погребена быша,/ а имена их живут в роды./ Премудрость их поведят людие,/ и похвалу их исповесть Церковь.

### Премудрости Соломоновы чтение (гл. 3, ст. 1-9):

Праведных души в руке Божией,/ и не прикоснется их мука./ Непщевани быша во очесех безумных умрети./ И вменися озлобление исход их./ И еже от нас шествие - сокрушение, они же суть в мире./ Ибо пред лицом человеческим аще и муку приимут,/ упование их безсмертия исполнено./ И в мале наказани бывше,/ великими благодетельствованы будут,/ яко Бог искуси я и обрете их достойны Себе./ Яко злато в горниле, искуси их/ и, яко всеплодие жертвенное, прият я,/ и во время посещения их возсияют/ и, яко искры по стеблию, потекут./ Судят языком и обладают людьми,/ и воцарится Господь в них во веки./ Надеющиися Нань уразумеют истину,/ и вернии в любви пребудут Ему./ Яко благодать и милость в преподобных Его/ и посещение во избранных Его.

### На литии стихира храма и святых, глас 2:

Радуйся, карельская похвало,/ священномучениче Николае,/ усердно Церкви Христовой послуживый/ и, угрозы безбожник нивчтоже вменив,/ за веру Христову смерть приемый./ О, новомучениче всеблаженнейший,/ моли милостиваго Бога/ спастися душам нашим.

Радуйся, светильниче северных страны нашея,/ праведный отроче Артемие,/ ты, ангельский нрав и душу непорочную имея,/ благодетельными

чудотворении утешал еси/ всех, молящихся с любовью и благодарственно  
восписующих тебе:/ радуйся, предстателю наш праведный.

Радуйтесь, архипастырие достославнии,/ Филиппе и Феофане, угодницы  
Христови,/ чистоты Церкви блюстителие вернии,/ богословы изряднейшии./ О,  
архипастырие достославнии,/ Божества Триипостаснаго вернии служителие,  
молите спастися душам нашим.

**Слава, глас тойже:**

О, Всесильне Христе Царю!/ Явивый земли нашей сонм святых:/  
преподобных и праведных,/ святителей и чудотворцев,/ пастырей и  
архипастырей,/ мучеников и новомучеников./ Тех молитвами помилуй и спаси  
душы наша.

**И ныне, Богородичен, глас тойже:** О, чудесе новаго, всех древних чудес:

**Молитвы на литии:**

Спаси, Боже, люди Твоя и благослови достояние Твое, посети мир Твой  
милостию и щедротами, возвыси рог христиан православных и низпосли на ны  
милости Твоя богатая: молитвами Всепречистыя Владычицы нашея  
Богородицы и Приснодевы Марии: силою Честнаго и Животворящаго Креста:  
предстательства честных Небесных Сил безплотных: честнаго славнаго  
Пророка, Предтечи и Крестителя Иоанна: святых славных и всехвальных  
апостол Петра и Павла, святаго апостола Андрея Первозваннаго и прочих всех  
святых апостол: иже во святых отец наших и вселенских великих учителей и  
святителей, Василия Великаго, Григория Богослова и Иоанна Златоустаго: иже  
во святых отец наших святителей Николая, Мир Ликийских, Чудотворца и  
Спиридона Тримифунтскаго Чудотворца: святых равноапостольных Мефодия и  
Кирилла, учителей Словенских, святых равноапостольных великаго князя  
Владимира и великия княгини Ольги: иже во святых отец наших, святителя  
Михаила, перваго митрополита Киевскаго, первосвятителей Московских и всея  
Руси, Петра, Алексия, Ионы, Макария, Филиппа, Иова, Еромогена и Тихона,  
святых, в земли Карельстей просиявших: святаго благовернаго великаго князя  
Александра Невскаго, святителя Феофана, Затворника Вышенскаго, Геннадия,

архиепископа Новгородскаго; святых чудотворцев Авраамия Ростовскаго и Артемия Веркольскаго; священномучеников Вениамина, митрополита Петроградскаго, Дамиана архиепископа Курскаго и Никодима епископа Белгородскаго, священномучеников Николая и Василия пресвитеров; преподобных и богоносных отец наших: Авраамия Кенскаго и Елеазара Анзерскаго, Антония Римлянина и Евфросина Синозерскаго, Адриана Ондрусовскаго и Кассиана Комельскаго, Александра Свирскаго и Александра Ошевенскаго, Арсения Коневскаго и Никодима Кожеезерскаго, Вассиана и Ионы Пертоминских, Афанасия Сяндемскаго и Афанасия Наволоцкаго, Варлаама Керетскаго и Варлаама Пинежскаго, Геннадия и Никифора Важеозерских, Германа Белоезерскаго и Диодора Юрьегорскаго, Сергия и Германа Валаамских, Евфимия и Антония Карельских, Зосимы, Савватия, Германа Соловецких, Ионы Яшезерскаго и Лонгина Яренгскаго, Сергия и Варвары Островских, Макария Высокоезерскаго и Лазаря Муромскаго, Корнилия Палеостровскаго, Трифона Печенгскаго и Феодорита Кольскаго, Пахомия Кенскаго и Кассиана Соломенскаго, Корнилия и Ферапонта Островских, святого блаженнаго Фаддея Петрозаводскаго, святого праведнаго отца нашего Иоанна Кронштадтскаго и всех святых, в земли Карельстей просиявших, ихже и память ныне совершаем, святых праведных Богоотец Иоакима и Анны и всех святых, молим Тя, Многомилостиве Господи, услыши нас, грешных, молящихся Тебе, и помилуй нас.

**В**ладыко Многомилостиве, Господи, Иисусе Христе Боже наш, молитвами Всепречистыя Владычицы нашея Богородицы и Приснодевы Марии, силою Честнаго и Животворящаго Креста, предстательства честных Небесных Сил безплотных, честнаго славнаго Пророка, Предтечи и Крестителя Иоанна, святых славных и всехвальных апостол, святых славных и добропобедных мучеников, преподобных и богоносных отец наших и всех святых, в земли Карельстей просиявших, ихже и память ныне совершаем, святых праведных Богоотец Иоакима и Анны и всех святых Твоих, благоприятну сотвори молитву нашу, даруй нам оставление прегрешений

наших, покрый нас кровом крилу Твоею, отжени от нас всякого врага и супостата, умири нашу жизнь, Господи, помилуй нас и мир Твой, и спаси души наша, яко Благ и Человеколюбец.

**На стиховне стихиры, глас 2:**

Святых память велие торжество явися земли нашея:/ сии бо воистину дела и словесы и многовидным житием/ и от Бога дарованием соделашася святы./ И ныне, прославльшему их Христу предстояще,/ молятся о нас прилежно,/ любовью совершающих светлое их торжество.

**Стих:** Честна пред Господем/ смерть преподобных Его.

Преподобнии отцы всечестнии,/ Лазарю и Афанасие,/ Ионо и Вассиане,/ вы, на колесницу добродетелей возшедше,/ к Богу востекосте,/ победныя почести приемлюще./ Темже блажим вас, прехвальнии.

**Стих:** Блажен муж, бояйся Господа,/ в заповедех Его восхощет зело.

Ликом постническим сочетавшеся,/ преподобнии Макарие и Лонгине,/ ныне во обителях Небесных живете,/ веселящеся, идеже ликуют Ангели./ Темже поминайте любовь блажащих вас на земли/ и святое ваше творящих празднество.

**Слава, глас 3:**

Преподобнии отцы, мира красоту и сладость временную возненавидевше/ и иноческое житие возлюбивше,/ Ангелом собеседницы бысте/ и светильницы многосветлии земли нашей,/ чудесами, яко звезды сияете,/ всех нас поминайте, совершающих священную память вашу,/ мы бо чада ваша/ и вас на помощь призываем,/ просяще даровати нам мир и велию милость.

**И ныне, Богородичен, глас тойже:** Творец и Избавитель мой, Пречистая:

**Тропарь, глас 8:**

Якоже плод красный Твоего спасительнаго сеяния,/ земля Карельская приносит Ти, Господи,/ вся святыя в той просиявшия./ Тех молитвами в мире глубоце,/ Церковь и страну нашу Богородицею соблюди Многомилостиве.

## На утрени

### Величание:

Величаем вас,/ вси святии, в земли Карельстей просиявшии,/ и чтим святую память вашу,/ вы бо молитесь за нас/ Христа Бога нашего.

### Таже седален, глас 3:

Днесь просия ваша память, святии, якоже пресветлая заря над землею нашею тьму безбожия и нечестия отгоняющи и сердца верных просвещающи, во еже пети Христу: Иисусе, Спасе наш, слава Тебе.

### Слава, глас тойже:

Воспоим, вернии, во благознаменитый день святых наших, предварим лице Христа во исповедании и во псалмех воскликнем Ему: призри, Господи, с небесе и виждь, и посети виноград сей, и утверди и, егоже насади десница Твоя.

### И ныне, Богородичен:

Ты еси Похвала верных, Безневестная, Ты Предстательница и Прибежище христиан, Стена и Пристанище: к Сыну бо Твоему мольбы прилежнныя возносиши, Всенепорочная, и спасаеши от бед верою и любовию Богородицу Чистую Тебе славящая.

### По 50-м псалме стихира, глас 6:

Иже на земли Ангели/ и на Небеси человецы Божии,/ мира благое украшение/ и Отечества нашего похвалу,/ всех святых земли Карельския почтим,/ насаждени бо в дому Господни,/ процветоша праведно/ и, яко кедр в пустыни, умножиша стадо Христово словесных овец/ в преподобии и правде.

### Канон, глас 2.

#### Песнь 1

*Ирмос: Грядите, людие,/ поим песнь Христу Богу,/ раздельшему море и наставльшему люди,/ яже изведе из работы египетская,/ яко прославися.*

**Припев:** Все святии земли Карельския, молитесь Бога о нас.

Светильников светлых множество на свещнице церковней яви Господь: святителей, мучеников, преподобных и праведных, иже житием своим землю Олонецкую украсиша.

Огнь Божественный возсия и оживотвори zde пустыню, прежде бесплодну и необитаему, последи же подвиги преподобных Сергия и Германа, аки крин, процветшую и инок множество возрадившую.

Благодаряще, поим песнь Христу, пославшему нам Зосиму, Савватия, Германа Соловецких чудотворцев, иже, мира отвратившися, в непроходимыя и пустыя острови Соловецкия вселишася и подвиги своими Превечному Богу угодиша.

Добропобеднии Антоние Сийский, Афанасие Наволоцкий, Варлааме Пинежский! Вы, стрел разжженных лукаваго и огня, в лице вам дышущаго, не убоявшися, Христа проповедаете и на страдание мужественно потекосте. Темже ныне со святыми водворяетесь.

**Богородичен:** Воспоим песнь Пречистой Богородице Деве, славяще рождество Христа Бога непостижимое и вопиюще: помилуй стадо Твое, едина Всепетая.

### Песнь 3

*Ирмос: На камени мя веры утвердив,/ расширил еси уста моя на враги моя;/ возвесели бо ся дух мой, вегда пети:/ несть свят, якоже Бог наш,/ и несть праведен паче Тебе, Господи.*

Многомилостиве Господи, сохрани землю Олонецкую и даждь ей быти ненаветней от врагов молитвами святых Твоих, в ней подвизавшихся.

Утверди нас в Тебе, Господи, молитвами собеседник Твоих Александра Свирскаго и Елисея Сумскаго, ихже искуси, обрете достойны Себе и чудесы прослави.

Киими песньми восхвалим угодников Божиих, Лазаря и Афанасия Муромских, обителию святою пустыню украсивших и светом веры Христовы лопарей просветивших?

Смирением, яко ризою, облеклся еси, священномучениче Николае, егда клеветницы без вины на смерть тя осудиша. Темже величаем страдания твоя и славословим кончину твою.

**Богородичен:** Ангел Святейшая, Богородице Дево, под Твой кров притекаем, Владычице, людие Твои, Помощница буди нам, рабом Твоим, и спасения Подательница.

#### Песнь 4

*Ирмос: Пришел еси от Девы, не ходатай, ни ангел,/ но Сам, Господи, воплощся,/ и спасл еси всего мя человека:/ тем зову Ти:/ слава силе Твоей, Господи.*

Радостно едиными усты и сердцем величаем вас, святии земли Олонецкия, и чтим святую память вашу, вы бо молите о нас Христа Бога нашего.

Единонравно на земли поживше и земная мудрования презревше, ум в горняя вперили есте, богомудрии Геннадие и Никифоре Важеозерстии, отцы всехвальнии.

Духом провидя славу земли Северныя, Антоние Римлянине достославне, от ветхаго Рима на камени в тую преплыл еси и веру правую в ней утвердил еси.

Незлюбив, праведен и милостив быв, Артемие Веркольский, блаженства Небеснаго в земли кротких сподобился еси, идеже вкушаеши вечнаго утешения.

**Богородичен:** Свет Божественный рождши, явилася еси, Богородице Дево, Заступница усердная рода христианскаго.

#### Песнь 5

*Ирмос: Света Подателю и веков Творче, Господи,/ во свете Твоих повелений настави нас:/ разве бо Тебе иного Бога не знаем.*

Тихое и доброе пристанище яви нам Господь, в земли Олонецтей Божественный Свой виноград насадив, из коего вино чудное источи, спасительным и духовным питием нас напоая.

Явил еси, Христе Боже, угодники Твоя, Авраамия и Корнилия Палеостровских, ихже терпеливно на добрых пажитех веры возрастил еси.

Преподобнии отцы наши, Ионо Яшезерский и Ионо Клименецкий, вы слезными потоки души напоили есте и непорочнаго жития духовное благомошие явили есте, богомудрии.

Радуйся, преподобне отче Макарие Высокоезерский, ты, яко мудрая пчела, мед духовный собирая, сосуд избранный явился еси. Темже достойно тя ублажаем.

**Богородичен:** Богородице Дево, Ты еси нам святое ограждение, источник исцелений и совершенное спасение душ наших.

### Песнь 6

*Ирмос: В бездне греховней валяся,/ неизследую милосердия Твоего призываю бездну:/ от тли, Боже, мя возведи.*

Воспеваем вас, вси святии земли Олонецкия, яко противу начал и властей злобы поднебесныя дерзновенно ополчистесь и тех коварства любовию и смирением победисте.

Звезды пресветлыя явистесь, вернии раби Господни: Пахомие Кенский, Александре Ошевенский, Кириаче Каргопольский. Вы бо, узким путем шествовавшие, яко постницы, в алчбе и жажде временное житие проводисте; яко послушницы, Христово смирение стяжасте; и яко молитвенницы, блаженство плача о гресех познасте.

Трудницы Господни бысте, преподобнии отцы наши, Афанасие Сяндемский, Елеазаре Анзерский, образ злострадания и терпения показавшии, страстей прилоги и козни вражия попалившии и поругания яко врачество очистительное испившии.

Врага рода человеческого именем Христовым отгнав, преподобне Трифоне Печенгский, языческая жертвы упразднил еси и жертву хвалы на месте сем Богу принесл еси.

**Богородичен:** Исцелений неоскудное Сокровище еси нам, Богородице Дево, молим Тя, Владычице, даруй нам душ очищение и от бед освобождение.

### Кондак, глас 3:

Днесъ лик святых, в земли Карельстей Богу угодивших,/ предстоит в церкви и невидимо за ны молится Богу./ Ангели с ним славословят/ и вси святии Церкви Русския ему спразднуют,/ о нас моляще купно Превечнаго Бога.

### Песнь 7

*Ирмос: Божия снизхождения/ огонь устыдеса, в Вавилоне иногда,/ сего ради отроцы в пеци, радованною ногою,/ яко в цветнице, ликующе, пояху:/ благословен еси, Боже отец наших.*

Храм Бога жива суще, святии отцы наши, любви Его ради живота своего не пощадили есте, темже, миродержателя тьмы века сего победивше, вся сети его, яко паучину, разорили есте, поюще: благословен еси, Боже отец наших.

Возсияли есте в мире, яко светильницы светлии, преподобнии отцы наши, Адриане Ондрусовский и Киприане Сторожевский, неусыпающую скорбь о гресех стяжавшии и слезы многия о них пролившии. Темже, послушанию и смирению навывше, Христу Спасителю взывали есте: благословен еси, Боже отец наших.

Обители Духа Пресвятаго явились есте, преподобнии отцы наши, Авраамие и Никодиме Кожеозерстии, Евфимие и Феликсе Карельстии, многими скорбьми в Царство Небесное вшедшии, идеже ныне воспеваете: благословен еси, Боже отец наших.

Чудотворче Кронштадтский Иоанне! Ты молитвою твоею падшия возставлял еси, недужныя исцелял еси. Ныне же, во славе Небесней пребывая, не остави нас, почитающих память твою и верою зовущих: благословен еси, Боже отец наших.

**Богородичен:** Заре Светоносная и Сене Небесная, Богородице Дево, Свет неизреченно рождшая, просвети, Владычице, и наша души, грехи омраченныя.

### Песнь 8

*Ирмос: Победители мучителя и пламене/ благодатию Твоею бывше,/ заповедем Твоим зело прилежаще,/ отроцы вопияху:/ благословите, вся дела Господня, Господа.*

Премирная жизни образ миру явившии, избрание свое подвиги благочестия оправдавшии и правый путь к Небеси нам показавшии, преподобнии отцы наши, молитесь Бога о нас.

Основание непоколебимое Церкви наша явились есте, отцы преподобнии Кирилле Челмогорский, Арсение Коневский, Диодоре Юрьегорский, благое иго Христово люботрудно понесшии, Христа ради всеконечно себе отвергшиися и в терпении души ваша стяжавшии.

Широкий путь греха презревше, путем тесным и прискорбным до конца дний шествовали есте, преподобнии отцы наши Варлааме Керетский, Евфросине Курженский, Кассиане Соломенский, и, смирением плоть духу поработивше, Небесных Обителей достигли есте.

О, пастырю блаженне Феофане! Ты, в тайных подвизех течение совершая, яко светильник пресветлый людем явился еси и чада духовная добре воспитал еси, лучами словес твоих путь ко спасению указуя.

**Богородичен:** Угаси в нас пламень греховный, Богородице Дево, и волю Сына Твоего научи творити нас, Едина Чистая и Благословенная.

### Песнь 9

*Ирмос: От Бога Бога Слова,/ неизреченною мудростию, пришедшаго обновити Адама,/ ядию в тление падшаго люте,/ от Святыя Девы неизреченно воплотившагося нас ради,/ вернии, единомудренно песньми величаем.*

Песньми духовными прославляем вас, преподобнии! Вы бо, вся хотения Господня исполнивше и многия скорби в мире претерпевше, на Небеса со славою возшли есте, и тамо ныне с лики ангельскими Бога величаете.

Преподобнии отцы наши Елеазаре и Назарие Олонецтии! Вы, единомудренни бывше и всякое плотское пристрастие вседушно отвергше, едино на потребу подвиги велиими взыскали есте.

Святаго блаженнаго Фаддея Петрозаводскаго да ублажим, той бо отвержением себе Богу последова и подвигом юродства разум Христов стяжа. Сего ради, многая страдания претерпев, в покой Царствия Небеснаго вниде.

О, велицнии сродницы наши, именованнии и безыменнии, явленнии и неявленнии, Небеснаго Сиона достигшии и славу многу от Бога приимшии! Утешение нам, в скорби сущим, испросите, веру правую в нас укрепите и люди расточенныя соберите, песнь благодарения, яко дар любви, от нас приемлюще.

**Богородичен:** Богородице Дево, Надеждо ненадежных и нечаянная Радосте наша! Величаем Тя, Ты бо еси верных Заступление и душ наших Спасение.

**Светилен, глас 1:**

Радуйся, славная земле Карельская, слава бо святых твоих в тебе возсия. Ликуйте ныне и веселитесь, благочестивии людие, яко сонм велий ходатаев Небесных имате пред Богом нашим.

**На хвалитех стихиры, глас 4:**

Преподобнии отцы наши,/ вы, яко цвети духовнии земли Карельския/ и сокровище неистощимое, нам явилися есте./ Сего ради прославляем прославльшаго вас Господа./ Егоже молим даровати душам нашим/ мир и велию милость.

Взыграйте днесь, горы и холми,/ восплещите, море и езера водная,/ срадуйтесь и сликовствуйте нам, вернии людие,/ в светоносный день памяти преподобных Сергия и Германа,/ на горах Валаамских,/ яко финиксы, процветших.

Приидите, празнолюбцы и постников сословие,/ верую и любовьию сошедшеся,/ постники дивныя, Зосиму и Савватия, почтим./ О, всеблаженнии, преподобным сожителие и ангелом собеседницы,/ о нас молитесь ко Господу,/ помиловатися душам нашим.

**Слава, глас 6:**

Преподобнии отцы земли нашея,/ вы, в законе Господни день и ночь поучавшеся,/ яко дерева, насажденнии при исходящих вод бысте/ и плод страданий в терпении Христу принесосте./ Темже, дерзновение к Нему имуще,/ испросите нам очищение грехов/ и велию милость.

**И ныне, глас тойже:** Богородице, Ты еси Лоза истинная:

## Молитва

О, преславнии и всехвальнии угодницы Божии, вси святии в земли Карельстей просиявшии! К вам, яко теплым ходатаем и предстателем нашим с молитвою смиренно прибегаем: умолите Милостиваго Бога, да дарует нам тихое и безмятежное житие в веце сем, да избавит нас от враг видимых и невидимых, от искушений и напастей, от соблазнов лукаваго и всякаго зла. На Страшнем же Суде Своем сподобит нас деснаго стояния и наследники Царствия Небеснаго сотворит, идеже купно с вами прославим Пречестное и Великолепое имя Отца и Сына и Святаго Духа, ныне и присно и во веки веков.

Аминь.

## Список

### Собора святых Петрозаводской и Карельской митрополии

1. Авраамий Ростовский, архим., чудотворец: †1073-1077; Окт. 29 || Ростов.; Кар.
2. Авраамий (в схиме Антоний) Кенский, Кожеезерский, прп.: †1634; Ин. 7 || Новг.; Кар.
3. Авраамий Палеостровский, игумен, ученик прп. Корнилия Палеостровского: †XV; Ав. 21 || Новг.; Кар.
4. Адриан Ондрусовский (Андрусовский), прмч.: †1549; М. 17; Ав. 26 || Новг.; Петерб.; Кар.
5. Александр Свирский, игумен, чудотворец: †1533; Ап. 17; Ил. 17; Ав. 30 || Новг.; Петерб.; Кар.
6. Александр (в схиме Алексей) Невский, вел. князь: †1263; Ав. 30; Н. 23 || Влад.; Новг.; Петерб.; Кар.
7. Александр Ошевенский, игумен: †1479; Ап. 20 || Новг.; Кар.
8. Акий (Астерий) Соловецкий, Кашкаранский, прп.: || Кол.; Новг.; Солов.
9. Андрей Первозванный, апостол из 12-ти, брат ап. Петра: †62; Ин. 20; Н. 30 || Ап. 12; Крым.
10. Антоний Сийский, иером.: †1556; Д. 7 || Новг.; Кар.
11. Антоний Карельский, прп.: †1418; Ап. 18 || Кар.
12. Арсений Коневский, прп.: †1447; Ин. 12 || Афон.; Новг.; Петерб.; Кар.
13. Артемий Веркольский, отрок: †1545; Ин. 23; Окт. 20 || Новг.; Кар.
14. Афанасий Мурманский, Олонецкий, игумен: †XV; Мр. 8 || Новг.; Кар.
15. Афанасий Наволоцкий, прп.: †XVI-XVII; Ян. 18 || Волог.; Кар.
16. Афанасий Островский, прп., ученик прп. Александра Свирского: †XVI; Ав. 30 || Новг.; Кар.

17. Афанасий Сяндемский , Вологодский, прп.: †после 1557; Ян. 18 || Волог.; Петерб.; Кар.
18. Варлаам Керетский, иером.: †XVI; Ян. 15; Н. 6 || Кол.; Кар.
19. Варлаам Пинежский, Важский, Шенкурский, прп.: †1462; Ин. 19 || Новг.; Кар.
20. Василий (Надеждин), пресвитер , сщмч. † 1930; Ф.6 || Новомуч.
21. Вассиан Пертоминский, Соловецкий, прп., чудотворец: †1561; Ин. 5:12 || Новг.; Солов.; Кар.
22. Геннадий Важеозерский, прп., ученик прп. Александра Свирского: †ок. 1516; Ф. 9 || Петерб.; Кар.
23. Геннадий Новгородский, архиеп.: †1505; Д. 4 || Моск.; Новг.; Кар.
24. Герман Валаамский, прп., чудотворец: †ок. 1353; Ин. 28; С. 11 || Новг.; Петерб.; Кар.
25. Герман Соловецкий, прп.: †1479; Ил. 30; Ав. 8 || Новг.; Солов.; Кар.
26. Дамиан ( в схиме Диодор) Юрьегорский, Каргопольский, прп.: †1633; Н. 20 || Новг.; Солов.; Кар.
27. Дамиан (Воскресенский), архиепископ Курский,сщмч.: † 1937, Ок.21|| Курск.,Новомуч.
28. Дионисий Островский, прп., ученик прп. Александра Свирского: †XVI; Ав. 30 || Новг.; Кар.
29. Евмений Олонецкий, Мурманский, прп.: †XV; Ин. 4 || Новг.
30. Евфимий Карельский, прп.: †1435; Ап. 18 || Кар.
31. Евфросин Синозерский, Новгородский, прмч.: †1612; Мр. 20 || Новг.; Кар.
32. Елеазар Олонецкий, Мурманский, прп. || Новг.
33. Елеазар (Севрюков) Анзерский, Соловецкий, прп.: †1656; Ян. 13 || Новг.; Солов.; Кар.
34. Елисей Сумский, Соловецкий, прп.: †XV-XVI; Ин. 14 || Новг.; Солов.; Кар.

35. Зосима Соловецкий, игумен: †1478; Ап. 17; Ав. 8; С. 3 || Новг.; Солов.; Кар.
36. Игнатий Островский, прп., ученик прп. Александра Свирского: †XVI; Ав. 30 || Новг.; Кар.
37. Иоанн Яренгский, прп.: †1544-1545; Ил. 3 || Новг.; Солов.; Кар.
38. Иона Клименецкий, Олонецкий, прп.: †1534; Мр. 28; Ин. 6 || Кар.
39. Иона Пертоминский, Соловецкий, прп., чудотворец: †1561; Ин. 5:12 || Новг.; Солов.; Кар.
40. Иона Печенгский, ученик прп. Трифона Печенгского, иером., прмч., † 1590, † 1589, Д. 2 || Кол.
41. Иона Яшезерский, прп.: †1589-1592; С. 22 || Новг.; Кар.
42. Иоанн Соловецкий, прп., священосец и ученик прп. Зосимы Соловецкого: || Новг.; Солов.
43. Кассиан Муезерский, Соловецкий, прп.: || Новг.; Солов.
44. Кассиан Комельский, прп.: †1537; М. 16 || Волог.; Кар.
45. Киприан Стороженский (Сторожевский), прп., бывший разбойник, ученик прп. Адриана Ондрусовского: †после 1598; Ав. 26; Н. 2 || Новг.; Петерб.; Кар.
46. Кириак Каргопольский, прп.: †1402; Ап. 28 || Кар.
47. Кирилл Челмогорский, прп., просветитель чуди: †1367; Д. 8 || Новг.; Кар.
48. Корнилий Островский, прп., ученик прп. Александра Свирского: †XVI; Ав. 30 || Новг.; Кар.
49. Корнилий Палеостровский, Олонецкий, игумен: †ок. 1420; М. 19; Ав. 21 || Новг.; Петерб.; Кар.
50. Лазарь Муромский, Олонецкий, игумен: †1391; Мр. 8 || Новг.; Кар.
51. Леонид Островский, прп., ученик прп. Александра Свирского: †XVI; Ав. 30 || Новг.; Кар.
52. Лонгин Яренгский, Соловецкий, прп.: †1544-1545; Ил. 3; Окт. 16 || Новг.; Солов.; Кар.

53. Макарий Высокоезерский, прп.: †1683; С. 19 || Кар.
54. Макарий Оредежский, Новгородский, прп., ученик прп. Александра Свирского: †1532; Ав. 9 || Новг.; Петерб.; Кар.
55. Назарий Олонецкий, Мурманский, прп.: †XV; Ин. 4
56. Никифор Важеозерский, прп., ученик прп. Александра Свирского: †1557; Ф. 9 || Петерб.
57. Никодим (Кононов), епископ Белгородский, сщмч., † 1918; Окт.22, Д.28|| Новомуч., Петерб.
58. Николай (Богословский), протоиерей, сщмч.: †1937; Н. 4 || Новомуч.
59. Павел Комельский (Обнорский), прп.: Ян. 10 || Волог.; Костр.; Радонеж.
60. Пахомий Кенский, прп.: †ок. 1515; суббота по Богоявлению || Новг.; Кар.
61. Савватий Соловецкий, прп., чудотворец: †1435; Ап. 17; Ав. 8; С. 27 || Новг.; Солов.; Кар.
62. Серапион Кожеезерский, прп.: Ин. 27 || Новг.
63. Сергей Валаамский, прп., чудотворец: †ок. 1353; Ин. 28; С. 11 || Новг.; Петерб.; Кар.
64. Тарасий Соловецкий, Кашкаранский, прп.: || Кол.; Новг.; Солов.
65. Трифон Печенгский, Кольский, прп., просветитель лопарей: †1583; Ф. 1; Д. 15 || Кол.; Новг.; Твер.
66. Фаддей Петрозаводский, блаж.: †1726; С. 3 || Кар.
67. Феликс Карельский, прп.: †1418; Ап. 18 || Кар.
68. Феодор Островский, прп., ученик прп. Александра Свирского: †XVI; Ав. 30 || Новг., Кар.
69. Феодорит Кольский, архим., просветитель лопарей: †1571; Ав. 17 || Волог.; Кол.; Новг.; Солов.
70. Феофан Затворник, Вышенский, еп.: Ян. 10; Ин. 16 || Петерб.; Ряз.; Тамб.

71. Ферапонт Островский, прп., ученик прп. Александра Свирского:  
†XVI; Ав. 30 || Новг., Кар.

72. Филипп II Московский и вся Руси (в миру Феодор Колычев),  
митр., чудотворец: †1569; Ян. 9; М. 30; Ил. 3 || Моск. Свт.; Новг.; Солов.; Твер.